

## LEITZAN


### Hemen ez da txantxarik

K. GOITIA / LEITZA

**D**agoeneko Santiburtzioak heldu zaizkigu. Udak badu abaida handiaz pasatzeko ohitura mardarikatua eta guk ezer gutxi egin dezakegu horren aurka. Denbora ahalik eta hoberen pasatzea litzateke alternatiba bakarra; zoroak bezala ibiltzea, hau eta hura eta inon direnak ikustea. Azkenean nekata, porru eginda, umore txarrez eta petralduta amaitzeko. Ez da txiki txikia gure buruari ematen diogun estutasuna, udarako egiten ditugun plan zoragarriekin —adjetiboa zentzu txarrean ulertua, noski.

Eskerrak udan festa ugari dauden. Gure burutazioak pikutara bidaltzeko tentaldia inoiz baino sendoagoa azaltzen zaigu. Malibura joateko asmoak garagardoan zirriborro bilakatzen dira eta askatasunaren zirrarak gure gorputza goitik behera zeharkatzen du. Metamorfosia, hori da hitzik egokiena; metamorfosia jasaten dugu festak hurbiltzen direnean. Lotsa lotsagabekeria bihurtzen da eta barruan daramagun tristurak hanka egiten du.

Guzti hau kontutan hartu dute festen antolatzaileek Santiburtzioak prestatzerakoan. Gustu finenak asetzeko buruhauste ikaragarriak pairatu ondoren, inoiz egin ez diren jaiak antolatu dituzte gure arduradun sakrifikatuek. Dena den, arazorik larriena parrandazalearen eta festazale zintzoaren gustuak bateratzea da: batak hau nahi badu, besteak ordu horietan lo egitea nahiago du; eta besteak goiz jaiki nahi badu, batak eguerdiko orduiak arte tripaz gora egon nahi du. Betiko kontua...



Festak antolatzeko orduan mundu guztiari atsegin zaizkion ekitaldiekin hasi behar da: entzierroak, txarangak eta berbenak.

Hauek denon gustuak dira, eta hala ez izatekotan hobe komenturen bat aurkitzea, ihardun izpiritualak ez daude hain gaizki.

Ekitaldi hauek prestatutakoan, betidanik egin diren ospakizunekin segiko dugu: ingurutxoa, ezpatadantzariak, haurrei agintea ematea, meza nagusia... Horiek sakratuak dira. Inгурutxoak eta ezpatadantzariak kentzekotan, zer geratzen zaigu?

Jadanik errazena eginga dago. Bertsolariak eta herri kirolak jende askorentzat garrantzitsuak badira ere, beti sortzen dute halako kezka berezia: eguraldia ona izango ote da, jendeak bazkaldu aurretik edo bazkalostean joatea nahiago izango du, joan zen urtean jendearen erantzuna epela izan zen... Hori musean jokatzea bezala izaten da, ordagoa bai ala ez.

Kirola ere ezin da ahaztu: futbola, txirindularitza eta pilota. Hauek gure hiru kirol maiteenak izanik, festak dira urteko lehiaketen azken partiduak ikusteko garairik egokiena. Arrakasta handia izaten dute ekitaldi hauek: jende ezaguna elkarren artean lehian ibiltzeak erakargarritasun berezia beti izan du.

Haurrentzako ekitaldiak behar beharrezkoak dira. Festa guztiak etxetik irten gabe pasatuz gero egongelan far west-eko gotorlekua eraiki edo erratzekin hockey partidua joka dezakete. Hobe dute buruhandiek txantxetan ibili eta etxeko altzairuak bakean uztea ●



Gustu finenak asetzeko buruhausteak pairatu ondoren, inoiz egin ez diren jaiak antolatu dituzte arduradun sakrifikatuek.



### Ez dute ez bitaminaren beharrik

dantzan ari diren mutil hauek. Sasoia soberan dute hanka puntan saltoak eta bueltak emateko Aurrera elkarteko ezpatadantzariak. Ikuskizun ederra urtero meza nagusiaren ondoren egiten den dantza bitxi hau.

Gaztaroa da izan ere garairik aproposena halako akrobaziak egiteko. Gero artritis eta beste mila gauza direla eta edozein hasten da komediak egiten. Ez dadila gazterik falta ikuskizun hau urtez urte errepikatzeko.

### TTANTTOAK

#### INGURUTXORIK EZ DA FALTA KO.

Ohi den bezala Leitzako festetan ez da ingurutxorik faltako. Ohiturei eutsi behar zaiela esan zuenari kaso eginez, aurtengoa ere dantza egiteko aukerarik egongo da. Gaur, gaueko hirurak aldera, ligatzeko ingurutxoa egingo da. Garagardoarekin aiti ibiltzen direnak ez diote bikoteari oinik zapalduko eta beharbada bila ari ziren amodiarekin topo egingo dute. Azukre koxkorrekin aspaldi topo egin zutenek berriz, datorren ostegunean bere ingurutxoa izango dute. Zer ote du ingurutxoak hain goxoa izateko...

#### BIHOTZ TRISTEAK ALAITZEKO.

Norbaitek bihotz tristerik badu ez dezala itxaropena galdu. Aurtengo festan antolatzaileek haietza errotitu dira eta inon diren musikariak inguratu dituzte samina gozotasun bihurtzeko. Naygi, Haritza, Gau Beldra, Arkaitz eta nola ez, Joselu Anaiak plazan jo eta ke arituko dira doinu kilikagarriak nahiz sentiberak zure belarrietan ipiniatz. Negar malkoren bat isuriko duzu malenkoniak eraginda.

#### FESTAK BAI KIROLA ERE BAI.

Herriko kirolzaleak ez dira aspertuko Santiburtziotan. Osasunak ligan lortutako postuak eta Indurainen arrakastak Tourrean egarriz utzi ditu herriko zaletuak. Haiek asetzeko lehiaketa ugari izango da Leitzan. Gaur arratsaldeko lauretan txirindulari jubenilak lehian ibiliko dira. Ostegunean Larbando futbol zelaian hirugarren mailako partidua eta Nafarroako harrijasotzaileen txapelketa egingo dira. Hauek ez dute bitamin beharrik.

#### DANTZARIAK ETA BERTSOLARIAK.

Aurrera elkarteko ezpatadantzariak arin arin dabilta. Beren trebezia ikusteko aukera izango dute herritar guztiak biharko meza nagusia entzun ondoren. Bertsolariak gauzak lasaiago hartzen dituzte. Dena dela, ezin dira lo gelditu eta buru argia izateaz gain albokoaren desafioak nondik joko duen antzeman behar dute. Lizaso, Euzkitze, Peñagarikano eta Mañukorta ez dira edozein moduko bertsolariak. Elkarren artean ziria sartzen ez dira erraz nekatzen.

#### AURTEN MAGO ETA GUZTI DUGU.

Aste kulturean gurekin egon zen Rafa Aldasoro berriro ere herrian izango dugu. Oraingoan ere arrakasta handia izango duela inork ez du zalantzan jartzen. Usoak, untxiak, zapiak eta beste mila gauza desagertzen dira bere kapelan gero berriz azaltzeko. Trikimailu politik egiten badaki mago honek. Izan ere, eskuak beti dira begiak baino azkarragoak. Badaezpada ez gehiegi inguratu edo desagertzeko zorian egongo zara. Auskalo non azaltzen zaren gero...

#### Gaur ezer ere ez galtzeko

- ☞ 12.00etan ezkilak jo eta suzeria botako da festei hasiera emateko.
- ☞ 16.00etan txirindulari jubenilak ziztu bizian ibiliko dira.
- ☞ 19.30etan Gaubela taldearekin dantzaldia eskeletoari astindutxoa emateko.
- ☞ 24.00etan Gaubelakoak beste astindutxoa gustora emango dizute.
- ☞ 03.00etan ligatzea nahi baduzu Inгурutxora gonbidaturik zaude.

#### Gorde indarrak biharko

- ☞ 07.30etan diana txistulari eta txarangarekin.
- ☞ 09.00etan entzierroa eta zezenak plazan.
- ☞ 10.30etan meza nagusia udal batzordea eta dantzariarekin.
- ☞ 12.00etan Aurrerako ezpatadantzariak plazan.
- ☞ 12.30etan pilota partiduak ikusgai.
- ☞ 17.30etan kontuz ibili zezenekin plazan.
- ☞ 18.30etan konpartsa eta erraldoiak herriko kaleetan.
- ☞ 20.00etan dantzaldia Ake-larre taldearekin.
- ☞ 24.00etan dantzaldiaren bigarren saioa.